

MetMalaysia kesan tanda hujan lebat pada 7, 8 Januari akibat Monsun Timur Laut

Luruan monsun bawa banjir lagi

Oleh KHADIJAH MOHAMAD NOR
dan FARHANA HANIM MOHD. MYDIN
berita@kosmo.com.my

KUALA LUMPUR – Belum pun habis azab banjir minggu lalu, penduduk di Pantai Timur Semenanjung diminta bersiap sedia kemungkinan berlakunya gelombang ketiga bah apabila Jabatan Meteorologi Malaysia (MetMalaysia) meramalkan luruan Monsun Timur Laut dijangka berlaku pada 7 dan 8 Januari ini.

Ketua Pengarah MetMalaysia, Datuk Che Gayah Ismail berkata, berdasarkan pemantauan yang dibuat, ada tanda-tanda bagi episod baharu luruan monsun, namun ia hanya dapat dipastikan sehari sebelum tarikh tersebut.

“Luruan monsun biasanya akan mengakibatkan berlakunya hujan lebat berterusan selama dua hingga tiga hari di beberapa negeri seperti Kelantan, Terengganu, Pahang dan Johor.

“Oleh itu, pihak kami akan sentiasa mengemas kini sebarang maklumat dari semasa ke semasa berhubung perkara ini di laman web rasmi dan laman sosial MetMalaysia termasuk di Facebook dan Twitter,” ujar Che Gayah ketika dihubungi *Kosmo!* semalam.

Luruan monsun merupakan satu fenomena hujan berterusan selama beberapa hari yang akan melanda negeri-negeri yang terlibat dalam perubahan iklim Monsun Timur Laut yang bermula pada bulan November 2014 hingga



LURUAN monsun atau hujan lebat yang dijangka turun berterusan pada 7 dan 8 Januari ini mungkin menyebabkan banjir sekali lagi melanda kawasan Pantai Timur Semenanjung.

Mac 2015.

Ia berlaku apabila angin sejuk dan kering yang datang dari kawasan Siberia bertemu dengan angin dari Barat Pasifik yang lembap dan panas.

Tambah Che Gayah, secara purata, terdapat empat hingga lima episod luruan yang membawa hujan lebat berlaku pada setiap musim monsun Timur Laut di Malaysia.

Justeru, katanya, tidak mustahil gelombang ketiga banjir yang melanda negara akan berlaku lagi dalam tempoh tersebut.

Sementara itu, Pakar Geografi dan Kajian Iklim Bandar, Universiti Kebangsaan Malaysia (UKM), Prof. Datuk Dr. Shaharuddin Ahmad berkata, hujan lebat yang dijangka berterusan itu dikhuatiri akan membawa

kepada peningkatan paras air sungai terutamanya di kawasan rendah.

“Walaupun pergerakan air tidak begitu kuat berbanding sebelum ini namun penduduk di negeri-negeri itu perlu sentiasa berwaspada,” katanya ketika dihubungi *Kosmo!* semalam.

Sementara itu, di Pulau Labuan malam kelmarin, ombak besar membadaai pantai pulau itu sehingga menimbulkan suasana cemas dalam kalangan penduduk, nelayan dan pengusaha pengangkutan laut.

Beberapa nelayan tempatan dan tekong bot dilaporkan tidak dapat berkomunikasi antara satu sama lain berikutan keadaan laut yang bergelora teruk.



PETA menunjukkan Monsun Timur Laut yang dijangka membawa hujan lebat berterusan pada 7 dan 8 Januari ini.

“Saya belum pernah melihat ombak sebesar ini,” kata Rahim Yusoff, 45, yang bertugas dengan sebuah syarikat minyak dan gas semalam.

Beliau merujuk kepada ombak setinggi dua dan empat meter yang membadaai struktur jeti berhampiran Pelabuhan Labuan.

UNTUK maklumat lanjut mengenai cuaca, sila hubungi talian hotline MetMalaysia 1300-22-1638 atau layari laman web www.met.gov.my



CHE GAYAH



SHAHARUDDIN